

Na osnovu člana 16. stav 4. Zakona o Vladi Zeničko-dobojskog kantona- Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 70. sjednici, održanoj dana 07.03.2025. godine, d o n o s i

Z A K L J U Č A K

I.

Prihvata se Mišljenje Ministarstva za rad, socijalnu politiku i izbjeglice o Nacrtu Zakona o izmjenama i dopunama Zakona o zapošljavanju stranaca, broj: 09-02-2154-1/25 od 28.02.2025.godine, koji je kantonima dostavljen na mišljenje od strane Doma naroda Parlamenta Federacije Bosne i Hercegovine.

II.

Zaključak sa Mišljenjem iz tačke I. upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/25
Datum, 07.03.2025. godine
Zenica

PREMIJER

Nezir Pivić

DOSTAVLJENO:

1x Ministarstvo za rad, socijalnu politiku i izbjeglice,
1x Stručna služba Skupštine,
1x a/a.



ZENIČKO DOBOJSKI KANTON
VLADA

n/r Premijera

n/r Sekretara

Broj: 09-02-2154-1/25

Zenica, 28.02.2025. godine

PREDMET: Mišljenje o Nacrtu Zakona o izmjenama i dopunama Zakona zapošljavanju stranaca, dostavlja se

Dom naroda Parlamenta Federacije Bosne i Hercegovine je uz akt broj: 02-02-1471/24 od 30.01.2025. godine skupštinama kantona dostavio tekst Nacrta Zakona o izmjenama i dopunama Zakona o zapošljavanju stranaca (u daljem tekstu: Nacrt Zakona) koji je razmatran na 15. redovnoj sjednici Doma naroda Parlamenta Federacije Bosne i Hercegovine, radi davanja mišljenja na predloženi tekst, budući da je oblast socijalne politike u zajedničkoj nadležnosti federalne vlasti i kantona, u skladu sa članom III.2e Ustava Federacije Bosne i Hercegovine.

Aktom Stručne službe Skupštine, broj: 01-02-2154-1/25 od 05.02.2025. godine, i aktom Stručne službe Vlade broj: 02-1-02-2154-1-1/25 od 10.02.2025. godine ovom ministarstvu je kao resornom dostavljen na mišljenje tekst Nacrta Zakona.

Nakon razmatranja dostavljenog teksta Nacrta Zakona ovo ministarstvo u okviru svoje nadležnosti daje sljedeće:

M I Š L J E N J E

Uvidom u dostavljeni Nacrt Zakona, utvrđeno je da se istim vrše izmjene i dopune članova 3., 8., 9., 15., 21., te da se dopunjuje odredba člana 15. na način da se dodaje nova odredba člana 15a. i da se u članu 22. stav (1) briše tačka d) Zakona o zapošljavanju stranaca („Službene novine Federacije BiH“, broj:111/12) i to:

- Članom 1. Nacrta Zakona član 3. stav (2) mijenja se na način da se određuje definicija obrtnika u skladu sa novim Zakonom o obrtu i srodnim djelatnostima u Federaciji Bosne i Hercegovine („Službene novine Federacije BiH“, broj: 75/21)
- Članom 2. Nacrta Zakona dodan je novi stav u članu 8. kojim se propisuje da je rješenje o radnoj dozvoli nadležna kantonalna služba dužna donijeti u roku najdalje 30 dana od dana podnošenja zahtjeva za njeno izdavanje.
- Članom 3. Nacrta Zakona iza stava (2) člana 9. dodaje se novi stav (3) kojim je propisano da će postupak i proceduru izdavanja radne dozvole propisati Federalno ministarstvo rada i socijalne politike, u roku od najdalje 90 dana od dana stupanja na snagu ovog zakona.
- Članom 4. Nacrta Zakona u članu 15. stav (1) dodaje se nova tačka g) kojom se propisuje izuzetak kod izdavanja radne dozvole, neovisno od utvrđene godišnje kvote radnih dozvola, strancu koji se zapošljava u skladu sa odlukom o deficitarnim zanimanjima iz dodatog člana 15a. ovog zakona.
- Članom 5. Nacrta Zakona dodaje se novi član 15a., kojim se propisuje da će na osnovu stanja na tržištu rada Federacije, u pogledu broja i strukture nezaposlenih osoba, te potreba

pojedinih djelatnosti, Federalni zavod za zapošljavanje najkasnije do 30.10. tekuće godine, nakon provedenih konsultacija sa reprezentativnim udruženjem poslodavaca, te uz prethodno pribavljenu saglasnost Federalnog ministarstva rada i socijalne politike, donijeti odluku o deficitarnim zanimanjima za koje nadležne kantonalne službe nisu obavezne pribaviti odobrenje Federalnog zavoda za zapošljavanje. Procjena stanja i potreba na nivou Federacije utvrđivala bi se na osnovu kriterija koji se odnose na zanimanja koja nedostaju, provedbe strateških i investicijskih projekata i drugih okolnosti koje su važne za ekonomski rast i održivi razvoj. Zanimanja iz navedene odluke bila bi izuzeta od provjere podataka na evidenciji nezaposlenih i davanja odobrenja Federalnog zavoda za zapošljavanje prilikom izdavanja radne dozvole.

- Članom 6. Nacrta Zakona mijenja se stav (1) člana 21. te se propisuje obaveza kantonalnim službama za zapošljavanje o vođenju evidencije o izdatim radnim dozvolama u skladu sa Pravilnikom o evidencijama iz oblasti zapošljavanja („Službene novine Federacije BiH“, broj: 74/18, 90/20).
- Članom 7. Nacrta Zakona u članu 22. stav (1) briše se tačka d) kojom se propisivalo da se odredbe ovog Zakona ne primjenjuju na stranca koji je direktor privrednog društva u većinskom vlasništvu stranog pravnog ili fizičkog lica.

Predložene izmjene i dopune predstavljaju usklađivanje zakonskih propisa sa potrebama tržišta rada, odnosno omogućavanja angažmana stranaca kako bi se riješio problem nedostatka radne snage, posebno u deficitarnim zanimanjima.

S obzirom da se radi izmjenama i dopunama koje su usvojene na 15. redovnoj sjednici Doma naroda Parlamenta Federacije Bosne i Hercegovine, te da je ovo ministarstvo već dalo mišljenje na Prednacrt ovog Zakona, koji se razlikuje od Nacrta Zakona u pogledu članova koji su bili predmet izmjena i dopuna, ovo ministarstvo je ponovo razmotrilo dostavljeni dokument, te s obzirom da se većina članova odnosi na usklađivanje sa pravnim okvirom koji tretira ovu oblast, u potpunosti podržava izmjene i dopune sadržane u članu 1. do 4. i 6. i 7. Nacrta Zakona.

Međutim, članom 5. Nacrta Zakona, odnosno novim članom 15a. potrebno je definirati da se, prije usklađivanja liste deficitarnih zanimanja, za zanimanja za koja je to moguće, nedostajući kadar obezbijedi kroz obuke, prekvalifikacije i dokvalifikacije nezaposlenih osoba, te da se usklade programi zapošljavanja koji se finansiraju putem Federalnog zavoda za zapošljavanje, odnosno kantonalnih vlada, u smislu povećanog finansiranja mjera aktivnih politika na tržištu rada u ove svrhe.

U ovom slučaju bi se pokušala smanjiti stopa dugoročno nezaposlenih, a samim time bi se na efikasniji način stvorila jasnija slika pri razdvajanju aktivnih i neaktivnih tražioca posla, te bi se i u obrazovnom sistemu mogla prilagoditi upisna politika u srednjim školama i na fakultetima, koja bi bila usklađena sa potrebama poslodavaca, odnosno tržišta rada.

S tim u vezi, održana je i sjednica Ekonomsko-socijalnog vijeća za područje Zeničko-dobojskog kantona, na kojoj je razmatran predmetni Nacrt Zakona, te je isti podržan od strane Grupacija poslodavaca ZE-DO kantona, a predstavnici Saveza samostalnih sindikata Bosne i Hercegovine, Kantonalni odbor ZE-DO kantona su ovom ministarstvu dostavili naknadno mišljenje koje je u prilogu ovog dokumenta.

Dostavljeno:

1x Naslov

1x a/a

MINISTAR

Antonio Šimunović

